

Na osnovu člana 16. stav 4. Zakona o Vladi Zeničko-dobojskog kantona-Prečišćen tekst („Službene novine Zeničko-dobojskog kantona“, broj 7/10), na prijedlog Ministarstva finansija, Vlada Zeničko-dobojskog kantona, na 124. sjednici, održanoj dana 11.09.2013. godine, d o n o s i

ZAKLJUČAK

I.

Utvrdjuje se Prijedlog Zakona o izmjeni Zakona o pripadnosti javnih prihoda na području Zeničko-dobojskog kantona.

II.

Prijedlog Zakona o izmjeni Zakona o pripadnosti javnih prihoda na području Zeničko-dobojskog kantona upućuje se u dalju skupštinsku proceduru po skrećenom postupku.

III.

Zaključak stupa na snagu danom donošenja.

Broj: 02-_____ /13.

Datum, 11.09.2013. godine

Z e n i c a

PREMIJER

Munib Husejnagić, dipl.ing.maš.

DOSTAVLJENO:

1x Ministarstvo finansija,

1x Stručna služba Skupštine,

1x a/a.

Na osnovu člana 37. stav 1. tačka g) Ustava Zeničko-dobojskog kantona, Skupština Zeničko-dobojskog kantona, na ____sjednici, održanoj dana _____ 2013. godine, donosi

Z A K O N
o izmjeni Zakona o pripadnosti javnih prihoda na području
Zeničko-dobojskog kantona

Član 1.

U Zakonu o pripadnosti javnih prihoda na području Zeničko-dobojskog kantona („Službene novine Zeničko-dobojskog kantona“, broj: 1/06, 2/06, 5/06 i 7/09), u članu 6., stav 1. mijenja se i glasi:

„Općinama se ustupa dio izvornih prihoda Kantona ostvarenih na nivou svake općine, kako slijedi:

1. 34,46% od naplaćenog poreza na dohodak, izuzev općini Žepče kojoj se ustupa 44,46% od naplaćenog poreza na dohodak,
2. 100% naplaćenog poreza na imovinu, naslijeđe i poklon i poreza na promet nekretnina utvrđenih kantonalnim propisima.“

Član 2.

Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o pripadnosti javnih prihoda na području Zeničko-dobojskog kantona.

Član 3.

Zakon stupa na snagu osmog dana od dana objavljivanja u “Službenim novinama Zeničko-dobojskog kantona”.

Broj:
Datum,
Z e n i c a

PREDSJEDAVAJUĆI

Sretko Radišić

O B R A Z L O Ź E N J E

I USTAVNI OSNOV

Ustavni osnov za donošenje ovog zakona sadržan je u članu 37. stav 1. tačka g) Ustava Zeničko-dobojskog kantona.

II RAZLOZI ZA DONOŠENJE I OBRAZLOŽENJE PRAVNIH RJEŠENJA

Općinsko vijeće Žepče je uputilo Inicijativu za izmjenu i dopunu Zakona o pripadnosti javnih prihoda na području Zeničko-dobojskog kantona („Službene novine Zeničko-dobojskog kantona“, broj:1/06, 2/06, 5/06 i 7/09), tako da se u članu 6. stav 1. važećeg zakona, dopuni postojeći tekst, te da glasi: „...34,46% od naplaćenog poreza na dohodak, osim Općini Žepče, kojoj pripada 44,46% naplaćenog poreza na dohodak.“

Tačkom 2. Odluke o integraciji Općine Žepče („Službene novine F BiH“, broj: 44/00 i 56/01), donesenoj od strane Visokog predstavnika za BiH, propisano je da: „uzimajući u obzir poseban karakter i odgovornosti općine Žepče, procenat prihoda koji će kanton vraćati općini Žepče će biti veći za najmanje 10 procenata od istog procenta koji se vraća prosječnoj općini u ovom kantonu, osim u slučaju ako se postigne drugačiji sporazum između kantona i načelnika i zamjenika načelnika Žepča nakon slijedećih općinskih izbora.“

Nije poznato da je do danas postignut „drugačiji sporazum“ po gore navedenom pitanju.

Zakonom o pripadnosti javnih prihoda u FBiH („Službene novine Federacije BiH“ broj: 22/06, 43/08 i 22/09) i kantonalnim Zakonom o pripadnosti javnih prihoda na području Zeničko-dobojskog kantona („Službene novine Zeničko-dobojskog kantona“, broj: 1/06, 2/06, 5/06 i 7/09), nije propisano uvećano vraćanje prihoda općini Žepče,

Ministarstvo finansija se u više navrata, počevši od 2006. godine, obraćalo dopisima i urgencijama Uredu Visokog predstavnika u BiH, po pitanju važenja gore navedene Odluke o integraciji Općine Žepče, te tražilo pojašnjenje: „koji procenat prihoda od poreza na plaću Zeničko-dobojski kanton treba izdvajati Općini Žepče?“

OHR se konačno u svome dopisu broj: 042/2011/DG/SS od 22. jula 2011. godine oglašio mišljenjem: „da je Odluka Visokog predstavnika o integraciji Općine Žepče i dalje na snazi, te da Kanton i dalje ima obavezu da općini osigurava sredstva koja su joj potrebna za vršenje nadležnosti koje su joj ustavnim putem povjerene“.

Zaključkom Skupštine Kantona, broj: 01-02-15445/13 od 16.07.2013. godine, prihvaćena je Inicijativa Općinskog vijeća Žepče za izmjenu i dopunu Zakona o pripadnosti javnih prihoda na području Zeničko-dobojskog kantona („Službene novine Zeničko-dobojskog kantona“, broj:1/06, 2/06, 5/06 i 7/09), te su zaduženi Ministarstvo finansija, Ministarstvo za pravosuđe i upravu i Vlada Kantona da u smislu predložene inicijative u roku od 60 dana pripreme i u skupštinsku procedure dostave Nacrt Zakona o izmjeni i dopuni Zakona o pripadnosti javnih prihoda na području Zeničko-dobojskog kantona.

Međutim, s obzirom da nije u pitanju složen i obiman zakon, a kojim se mijenja samo jedan stav jednog člana Zakona, umjesto nacrta zakona predlaže se podnošenje prijedloga zakona i pretresanje po skraćenom postupku, bez nacrta zakona, a u skladu sa članom 140. Poslovnika Skupštine Zeničko-dobojskog kantona – Novi prečišćeni tekst („Službene novine Zeničko-dobojskog kantona“, broj: 7/12).

Kako je Odlukom Visokog predstavnika za BiH o integraciji Općine, utvrđeno pravo na veći procenat povrata prihoda koji će Kanton vraćati samo za općinu Žepče, a ne i za ostale općine sa područja Kantona, tj. Odluka se primjenjuje samo za općinu Žepče, a Vlada i Skupština Kantona su već prihvatile predmetnu Inicijativu Općinskog vijeća Žepče za izmjenu i dopunu Zakona o pripadnosti javnih prihoda na području Zeničko-dobojskog, smatramo da nema potrebe provoditi javnu raspravu po ostalim općinama Kantona po navedenom pitanju. Imajući u vidu navedeno pripremljen je Prijedlog Zakona o izmjeni Zakona o pripadnosti javnih prihoda na području Zeničko-dobojskog kantona.

III FINANSIJSKI EFEKTI

Za donošenje i provođenje Zakona biće potrebno izdvajanje dodatnih finansijskih sredstva iz Budžeta Kantona u visini od cca 100.000,00 KM godišnje.

MINISTRICA

Sabina Heljić

